

## **Ebbaluṅa eyohudatu eya Yowaane Enyanjula**

Ebbaluṅa ya *Yowaane* yino Yowaane owaali omuhwenda wa Yesu nj'ogayinandiha ṅagati w'omwaha ogw'ataanu n'ecikumi oluvanyuma lw'ohusaaliwa hwa Kurisito. Yowaane saalaga ati nj'owanandiha ebbaluṅa yino aye geranga ati gaali mutangirisi. Yowaane gaṅandiha ebbaluṅa yino n'ali mu hibuga Efeeso.

Ebbaluṅa yino gayinandihiira omusinde oyu baali ni balanga baati Gaayo. Yowaane aloma ati Gaayo gaali meriwe era gaali n'omwoyo mulanji ni ganirisanga abageni.

### **Ebiri mu bbaluṅa yino mu buupi**

1. Ohwanjula (1:1)
2. Ahubbirisa Gaayo era amusunga ohweyongera ohwanirisanga abageni (1:2-8)
3. Yowaane aloma hu Diyotireefe ni Demetiriyo (1:9-12)
4. Engohoba (1:13-14)

### *Enyanjula*

<sup>1</sup> Ese omutangirisi, kuṅandihiira ewe Gaayo oyu nenda n'omwoyo gwange gwasigwosi.

<sup>2</sup> Meeri yange, kulombera ekabi ebiitu bihuti-inire bulanji era weyongere ohuba bulala ni Hatonda mu bulamu wuwo.

3 Nasangaala bugali abalebe mu Yesu ni baaja batunayira ng'olu ohigumiiye hu mazima aganjamba hu Yesu.

4 Ejuma ehisangaasa hy'ohunulira ti abaana bange bahigendera mu mazima.

### *Ebirani bya Gaayo*

5 Wahyange, oholire bingi n'oyeeda aboluganda wayire abandi baba bageni n'otabamanyire. Ebikolwa bibyo biraga biiti oli mwesigwa.

6 Abalebe aba waja obuyeedi baatunayira engeri eyi wendamo abafugiirira Kurisito bahyo. Era neyongera ohuhusunga ti weyongere ohuyeeda abaatu hy'abo ohweyongera mu lugendo lwawe.

7 Abalebe abo bagenda ni bajeeresa Yesu Kurisito era sibasuna buyeedi ohunwa mu batafugiirira Kurisito.

8 Olw'ehyo hirani ohuhuuma abaatu hy'abo mu mago geefe olwohuba huba hutambira njalala ni nabo mu hubuulira Amanuliro Amalaji.

### *Diyotireefe ni Demetiriyo*

9 Nanandiihira ehibbubbu hy'abafugiirira Kurisito hu hiitu c'ehyene aye Diyotireefe olw'ohwenda ohuba omutangirisi waawe siganjulirisa byange.

10 Era atiinare n'atulomaho bubi. Olw'ehyo, keesi ni nahaaje eyo nahalome mu lwijuuye hu ebi ahola. Saahoma hu hy'ohutunaha esiro hyonene cooka era sigenda n'ohusangalira

abageni ababahyalira. Nindi abo ababasan-gaalira ahena gababbinga banjwe mu hibbubbu hy'abafugiirira.

<sup>11</sup> Wahyange omuhoda, otebisyanga hya niye aye weyongere ohuhola ebirani. Oyo ahola ebirani, ebikolwa bibye biraga biiti mwana wa Hatonda. Aye ahola ebibi, ebikolwa bibye biraga biiti saamanyire Hatonda.

<sup>12</sup> Abaatu bosibosi baloma birani byereere hu Demetiriyo era ebi baloma by'amazima olwohuba ebyene byeraga. Hwesi humulomaho birani era ng'olu omanyire efe ebi huloma biba by'amazima.

### *Engohoba*

<sup>13</sup> Ndi n'ebingi eby'ohuhunandiihira aye ebbaluja siyihena.

<sup>14</sup> Suubira ohuuja eyo mangu kuboneho, hunjaye moni hu moni.

<sup>15</sup> Hatonda ahunje emiyaaya. Abameeri babo bahuheehiise. Keheeseho hiisi mulala hu bameeri beefe.

**Endagaano Epyaha ko n'ebitabo ebindi  
eby'Endagaano Ekayire mu Lunyole  
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

---

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff